

Thò Baiq Da Pêtrô  
 2 Pêtrô  
 Bàu Patô Adroi

*Hiniq wa Bàu Xèm Da Sech:*

Mangai yõc nhàn thò cô hadai mangai lùì Chuaq chiùq nan xa. Pêtrô pa'yèp wì haq bìac mangai hnài amòng.

*Mangai Achìh wa Hanam Achìh:*

Mangai achìh: Simôn Pêtrô. Haq achìh bàu: “Paulô oh daq loq waq da bèn”. Khoi achìh hanam 66 Atìq C.

*Bàu Anoi:*

Pêtrô tìah ca Mangai Gòm Trìu da Crich. Haq hnài mangai tiaq Chuaq phai canao loq ca mangai hnài amòng. Haq hnài wì haq phai yõc manoh lùì cajap wa broq bìac lem am ca Chuaq. Èh Chuaq Jêxu joq 'nàng tawìh hlài ta crõng taneh.

*Rìm 'Nat:*

1. Bàu Baxèm: 1:1–2
2. Yòng Càn Lam Trong Chuaq: 1:3–11
3. Bàu Anoi Hnài Da Pêtrô: 1:12–21
4. Bàu Pa'yèp Tajraq Hlài Mangai Hnài Amòng: 2:1–22
5. Chuaq Jêxu Tawìh Hlài Ta Crõng Taneh: 3:1–16
6. Bàu Pulùch: 3:17–18

*Bàu Bòch Hmàih*

<sup>1</sup> Au cô Simôn Pêtrô hapõng wa mangai sùq đồ da Chuaq Jêxu Crich,

Achìh thò cô ca 'bài mangai khoi jah nhàn yõc manoh lùì tìah ca nhèn nhò bìac ta-atoq da Boc Plình wa da Chuaq Jêxu Crich, Mangai Dèch bèn.

<sup>2</sup> Waiq xìn biac am dech, biac catèm, jah tǒc tam ca pì, nhò biac pì canao loq ca Boc Plình wa Chuaq Jêxu Crich, Chuaq da bèn.

<sup>3</sup> Taiq cwàng itai Boc Plình khoi am ca bèn rìm biac nhet òiđiq rìh wa i can rìh hadròih, nhò canao loq ca Haq ma creó ca bèn xam can 'ngah 'ngai wa biac khôn khaoq da Haq. <sup>4</sup> Taiq 'màng aih, Haq am ca bèn bàu hùaq òiđiq jaq càn wa canaq, nhò enh aih pì khoi claih ca biac ham enh da crǒng taneh, jah wìa mangai i manoh tìah troi manoh Boc Plình.

### *Biac Yòng Càn da Con Caiq Chuaq*

<sup>5</sup> Taiq 'màng aih, phai ran ta manoh 'mùt tam manoh lùì, biac khôn khaoq, tam ca biac khôn khaoq, biac loq 'nì, <sup>6</sup> tam ca biac loq 'nì, biac pagàt dađeh, tam ca biac pagàt dađeh, biac dràng cajap, tam ca biac dràng cajap, can rìh hadròih, <sup>7</sup> tam ca biac can rìh hadròih, biac loq xa-ǒch ca oh daq, wa tam ca biac loq xa-ǒch ca oh daq, can loq waq. <sup>8</sup> Taiq tàng òiđiq ca biac aih i tǒm gêh ta pì, wa bình halùih hòm, èh ùh hìaq òiđiq ǒi dech, ùh loh plì ta biac canao loq ca Chuaq Jêxu Crich da bèn. <sup>9</sup> Taiq mangai leq thìuq ca biac aih, haq mangai hnoq ùh hangai, ùh xao mat, wa hèt ca dađeh khoi jah Chuaq broq hreo đac ca tǒiq lǒi enh nèh.

<sup>10</sup> 'Màng aih, ôi oh daq! Phai ran broq waq ca biac creó da Haq, wa biac jah ràiđi da pì jah cajap, ma jah 'màng aih tàng pì broq 'màng aih, èh ùh jò leq tacro, <sup>11</sup> nhò 'màng aih trong mùt ta Diac Plình ǒi hloi hloi da Chuaq Jêxu Crich, jah pèh 'mang rùng rai òiđiq òiđi yǒc pì.

<sup>12</sup> 'Màng aih 'nhac ca pì loq ro, wa khoi jah cajap ta biac joq 'nàng troi manàiq, mahaq au xôq bahmàng hlài pì biac aih ùh hêq. <sup>13</sup> Mahaq jò au ǒi ǒi ta hnem chac hamac ǒi ò ò cô pàng leq, èh au pariaq hnài wa bahmàng pì biac cô, aih troq. <sup>14</sup> Ma jah 'màng aih Chuaq Jêxu Crich bèn khoi doi

ca au loq ùh dùnh toq leq hòm au cađac hnem chac hamac òi đò cô. <sup>15</sup> Mahaq au phai ran òi pariaq hnài pì, òiđiq atìq ca au cachit, pì jah hmàng ca bàu au khoi doi.

<sup>16</sup> 'Màng aih jò nhèn anoi ca pì loq cwìang itai wa bìac trùh hlài da Chuaq Jêxu Crich bèn, ùh xài nhèn tiaq bàu 'mon ùh troq, mahaq mat cla nhèn khoi hnoq bìac 'ngah 'ngai da Haq. <sup>17</sup> Ma jah 'màng aih Haq khoi nhàn yỏc cwìang itai wa can 'ngah 'ngai enh Boc Plình, Baq Haq, jò i bàu enh nòi đìq jaq ha'nhèq doi ca Haq: “Cô Con Au ma loq waq, Haq lem manoh Au rìm trong.”<sup>☆</sup> <sup>18</sup> Nhèn hadai khoi tàng bàu aih loh enh plình, jò nhèn òi ti Haq ta wang hadròih.

<sup>19</sup> 'Màng aih, nhèn lùì bàu 'bài mangai capoch thai Boc Plình ta Sech Hadròih cajap ji hnao hòm, aih bàu ma pì phai ngan, tìah ca đen xreo 'ngah ta nòi clam clòiq, trùh jò leq dahì mahno loh, wa halỏng daxroq jah tỏc ta manoh pì. <sup>20</sup> Adroi đởng bèn phai loq ro rang, ùh i ca bàu mangai capoch thai Boc Plình leq ta Sech Hadròih ma yỏc dèh manoh cla òiđiq anoi hnài. <sup>21</sup> Ma jah 'màng aih ùh i ca bàu mangai capoch thai Boc Plình leq trùh enh manoh mangai, mahaq aih nhò Yiang Hadròih broq ta manoh wì haq, òiđiq wì haq jah capoch tiaq bàu Boc Plình.

## 2

### *'Bài Thài Amòng*

<sup>1</sup> Calah nèh i mangai amòng capoch bàu loq adroi ta Diac Yothead, manàiq hadai i thài amòng ta pì, wì haq hnài đaoq 'nùt òiđiq broq waq ca raliang bìac Chuaq, chòiq đac Chuaq khoi rỏt wì haq, 'ràng bìac raliang ma renh ca dađeh. <sup>2</sup> I bàc ngai tiaq trong manhài trài 'mèq 'mac da wì haq, taiq wì 'màng aih èh trong bìac joq 'nàng 'bìq capoch

<sup>☆</sup> 1:17 1:17 Mat 17:5; Mỏc 9:7; Luc 9:35.

halê. <sup>3</sup> Wì haq taiq manoh loq ham, capoch bàu amòng òiđiq padô yõc cùng hang pì, mahaq biac baxa khoi dùnh gòm òiđiq wì haq, wa biac raliang cađac wì haq ùh cùi.

<sup>4</sup> 'Màng aih tàng Boc Plình ùh baxõng ca 'bình plình jò wì haq broq òiđiq, mahaq hwenh đac wì haq ta 'bau ùnh, ta nòi clam clòiq, ta aih Boc Plình cật òiđiq wì haq xam caxi mem tagwat, gòm hì hadrah. <sup>5</sup> Haq hadai ùh baxõng ca crõng taneh calah nèh, mahaq thê diac càn trùh jêh cađac 'nhòng ngang dù aih. Haq òiđiq toq Noah thài anoi hnài ta-atoq, wa tapèh ngai mangai 'noiđ; <sup>6</sup> tàng Haq khoi hadrah baxa phòq Sôđôm wa Gô-mô-ra, bùh đac baiq phòq aih loh blo, òiđiq broq dua ca 'bài mangai ngang dù 'nah ta atìđ; <sup>7</sup> wa tàng Haq khoi đõih dèch Lot, mangai caq õi ta-atoq, aih mangai loq mango taiq biac caq õi manhài trài da 'bài mangai ngan dù tau. <sup>8</sup> Ma jah 'màng aih mangai ta-atoq cô õi ta'ne wì haq hnoq biac ngang dù da wì haq broq, èh rìh hì haq chiùq xalep òiđiq jaq ta manoh; <sup>9</sup> èh Chuaq loq đõih dèch 'bài mangai ma loq canòm ca Haq claih ca biac padô 'nùt, hi khoi clêh òiđiq 'bài mangai ma rìh ùh ta-atoq òiđiq baxa ta hì hadrah; <sup>10</sup> aih 'bài mangai lam tiaq dèh manoh ham enh trong chac xech 'mèq 'mac, khìn đac wì ma wèq cwìang.

'Bài aih catèh dađeh, ùh hìaq loq yùq capoch 'mèq ca 'bình plình 'ngah 'ngai, <sup>11</sup> 'nhac ca 'bài 'bình plình i can dèh wa i cwìang itai yi hnao ca wì haq, xõq ùh yõc bàu hanip òiđiq kian wì haq enh ngìa ca Chuaq. <sup>12</sup> Mahaq wì haq tìah ca ngè aban ùh 'nì cleq, xa-ông loh òiđiq 'bìq raliang cađac, hùa capoch 'mèq biac wì haq ma ùh 'nì, èh wì haq 'bìq hù hnhung taiq can ngang dù da wì,

<sup>13</sup> wì haq rìh ngang dù, 'màng aih jah ca'naih hlài da wì haq biac ngang dù. Wì ngan biac ham caq ham ôđ dahì aih biac lem bùi. Wì haq padô 'nùt pì 'nang broq teo camaih wa teo amùa amech jò ha'ngui acaq hiniang da pì. <sup>14</sup> Ta

mat wì haq bình halùih bìac tango anang broq tôiq ùh i ca jò leq loq mech, padô adràc 'bài mangai ùh cajap manoh. Wì haq i manoh loq ham enh, aih 'bài con caiq đàng ca waiq hanip. <sup>15</sup> Wì haq khoi cađac trong jang, lam trong ùh troq, lac tiaq trong da Ba-la-am, con calô Bêô, aih mangai ham ca 'bac cùng da bìac ngang dù, <sup>16</sup> mahaq Ba-la-am 'bìq trech taiq bìac ùh troq ma haq broq, èh i mòi q toq con lùa loq capoch bàu mangai, tạt đac bìac broq ranhùa da mangai pajàu loq adroi aih.

<sup>17</sup> 'Bài aih tìah ca tamöc ùh i ca diac, tìah ca hiloc 'bìq cayoedêh 'nong lam, bìac clam clôi q hapinh hapàt khoi gòm đòiq wì haq. <sup>18</sup> Wì haq yöc bàu capoch jìang, capoch ra'ngòt ùh i ca lòi q cleq, padô ta adràc nhò ham enh chac xech wa bìac manhài trái, wì ma neo wia khoi đeh ca bìac tôiq lô. <sup>19</sup> Wì haq hùaq am bìac ùh tawac ùh pakènh ca con mangai, mahaq cla wì haq broq dích hapöng ca bìac manhài trái. Ma jah 'màng aih, tàng con mangai đòiq bìac cleq khoi ta'blêq ca dadeh, èh haq broq dích hapöng ca bìac aih. <sup>20</sup> Tàng wì haq nhò bìac canao loq ca Chuaq Jêxu Crich, Mangai Dèch, wì jah claih khoi ca tôiq lô da cởng taneh, khoi èh xôq ỏi tawìh hlài ta tôiq lô, broq hapöng ca tôiq lô mòi q yàng hòm, èh 'nah ta atìq calöih wì haq 'mèq yi hnao ca adroi nèh. <sup>21</sup> Tàng wì haq ùh lah loq 'nì ca trong ta-atoq, aih yi lem ca wì haq loq, èh tawìh cởng cađac bàu thê hadròih ma khoi 'noh am ca wì haq. <sup>22</sup> Wì haq joq troq troi bàu ma khoi capoch: “Coq liah hlài dèh hac,”<sup>☆</sup> “chùa 'nheo khoi hreo, èh loh ca tàm hlài ta tráp.”

### 3

#### *Hì Hadrah da Chuaq*

<sup>1</sup> Ôi oh daq au ma loq waq, cô thò yàng baiq au achìh ca pì: Thò cô hadai tìah ca thò yàng adroi, đòiq bahmàng hlài

---

<sup>☆</sup> 2:22 2:22 BR 26:11.

wa parông manoh hèm lem da pì. <sup>2</sup> Au enh oh daq hmàng hlài ãiq ca bàu da mangai hadròih capoch thai Boc Plình khoi anoi adroi, wa bàu thê da Chuaq Jêxu Crich Mangai ma Dêch bèn, khoi anoi 'noh nhò nhèn mangai sùq ão Haq.

<sup>3</sup> Adroi ãng ãiq bèn phai loq, ta 'bài hì atiq lùch cô êh, i bàc ngai trùh capoch bàu do halê, aih 'bài mangai caq ãi tiaq trong ham enh ãađeh, <sup>4</sup> wì haq ãoi: “Bàu ma hùaq ca biac trùh hlài da Chuaq ta leq? Ma jah 'màng aih enh jò boc yaq bèn cachit, rìm biac ta crõng taneh xôq tiah ca jò baxèm i plình crõng taneh.” <sup>5</sup> Wì haq to hêt cađac calah nèh, nhò bàu Boc Plình men i plình crõng taneh, taneh loh enh ãiac khoi broq wìa ãi ta'ne ãiac, <sup>6</sup> crõng taneh jò aih taiq ãiac làn ma 'bìq raliang cađac. <sup>7</sup> Mahaq plình crõng taneh manaiq, hadai nhò bàu Haq ma ãi padon ãoiq ca ùnh; gòm trùh hì hadrah jah raliang cađac 'bài mangai ngang ãi.

<sup>8</sup> Mahaq ô 'bài mangai au ma loq waq, apaq hêt ãi enh ngìa ca Chuaq, mòiq hì tiah ca mòiq ngõng hanam, mòiq ngõng hanam tiah ca mòiq hì. <sup>9</sup> Chuaq ùh adia ca biac Haq hùaq broq, tiah ca mòiq 'nah ngai khoi hèm, mahaq Haq khoi yõc ãeh manoh chiuq àt ãai pì. Haq ùh enh ca mòiq ngai leq cachit hnhung, mahaq Haq enh rìm ngai jah canao loq wa cađac ãeh manoh broq ãoiq lô.

<sup>10</sup> Hì da Chuaq jah trùh tiah ca mangai atùng. Jò aih ta plình i atêh càn tagràng tagrát, hi khoi hnhung cađac taneh wa ãiq ca biac ma rìh ãi ta crõng taneh, ùnh bùh ãng ãiq.

<sup>11</sup> Taiq rìm biac êh phai raliang ãng ãiq xam ùnh, êh pì phai wìh wìa mangai 'màng leq? Pì phai rìh mòiq 'nhòng rìh hadròih wa caq ãi lem tiaq manoh enh Boc Plình, <sup>12</sup> jò bèn gòm ngèh ca hì da Chuaq renh trùh, aih hì ãiq ca plình jah bùh cađac wa rìm biac ta aih cheo ãng ãiq. <sup>13</sup> Mahaq

tiaq bàu hùaq da Chuaq, bèn gòm plình neo, taneh neo nòi toq i bìac ta-atoq hêq.

<sup>14</sup> 'Màng aih êh ôi oh daq au ma loq waq, taiq pì ngèh gòm bìac aih, êh phai wèq dađeh đòiq ùh i ca teo, ùh i ca xít, ùh i ca nòi jah trech enh ngìa ca Chuaq. <sup>15</sup> Phai ngan loq ro rang bìac chiùq àt dùnh yôh da Chuaq, aih đòiq jah dèch claih, tìah ca Paulô oh daq bèn loq waq, nhò bìac khôn rabiaq Boc Plình am, khoi achìh thò ca pì. <sup>16</sup> Ta rìm capiac thò haq capoch hlài bìac aih, i 'nah nòi xa ca 'nì loq, bìac ma 'bài mangai awàt yóc capoch lìq, tìah ca wì haq khoi anoi hlài ùh troq ta 'bài Sech Hadròih ma 'noiç, broq ca dađeh 'bìq hù hnhung.

<sup>17</sup> Taiq 'mang aih, ôi oh daq ma au loq waq, pì khoi jah loq adroi dìq ca bìac cô, phai wèq dèh manoh oq đòiq pì ùh hìaq 'bìq padô 'nùt ta bàu capoch rangot ùh troq da mangai ngang dù, broq ca pì pi jah yòng cajap. <sup>18</sup> Mahaq phai yòng càn ta bìac am dech, wa bìac 'nì loq ro ca Chuaq Jêxu Crich, Mangai Dèch bèn. Waiq xìn bìac 'ngah 'ngai am ca Haq enh jò cô trùh hloi hloi. Amen.

Sech Hadròih  
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo  
All rights reserved.

2020-11-17

---

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d